



Infurmaziuns davart la vaccinaziun cunter COVID-19 da l'atun 2022 per dunnas en speranza

Il pli impurtant en furma concisa

- A tut las dunnas en speranza vegni recumandà fermamain da laschar rinfrestgar la vaccinaziun l'atun 2022.
- Cun la vaccinaziun da rinfrestgament pudais Vus meglierar Vossa protecziun cunter in grev decurs da la malsogna almain per in tschert temp.
- La vaccinaziun cunter COVID-19 è segira – er durant la gravidanza. Ella protegia Vus e Voss uffant.
- Per infurmaziuns supplementaras → [fegl d'infurmaziun «Infurmaziuns davart la vaccinaziun cunter COVID-19»](#)

Pertge sun jau spezialmain periclitada durant la gravidanza?

La ristga per in grev decurs da COVID-19 è tar dunnas en speranza per divers motivs pli auta che tar persunas da la medema vegliadetgna che n'èn betg en speranza. Per exempel sa mida il sistem d'immunitad durant la gravidanza. Durant la gravidanza pudais Vus esser pli predisposta per scherms infectus, per exempel per ina infecziun cun il coronavirus. La consequenza d'in grev decurs da la malsogna po esser quella, che Vus stuais vegnir tractada sin la staziun intensiva sco er vegnir intubada e respirada.

Ultra da quai avais Vus ina ristga pli gronda per ina naschienscha prematura, sche Vus survegnis ina greva malsogna dal coronavirus durant la gravidanza. Quai po avair per consequenza, che Voss uffant sto vegnir tgrà sin la staziun intensiva da la neonatologia.

Suenter la naschienscha n'essas Vus betg pli periclitada spezialmain. Ina vaccinaziun cunter COVID-19 vegn dentant er recumandada durant il temp da tezzar. Las dunnas che tezzan ch'èn vaccinas dattan vinavant cun il latg-mamma anticorpuls protectivs cunter COVID-19 al poppin.

Co protegia la vaccinaziun?

La vaccinaziun protegia Vus e Voss uffant. Ils anticorpuls che sa furman tras la vaccinaziun en Voss corp, pon er proteger il poppin.

Cura duai vegnir rinfrestgada la vaccinaziun?

Nus As recumandain d'As laschar vaccinar a partir da la 12avla emna da gravidanza (q.v.d. a partir dal 2. terz da la gravidanza). Da princip pudais Vus er As laschar vaccinar pli baud durant la gravidanza.

Er sche Vus planisais da vegnir en speranza, As recumandain nus la vaccinaziun cunter COVID-19.

La vaccinaziun po vegnir fatga il pli baud 4 mais suenter l'ultima vaccinaziun cunter COVID-19 resp. il pli baud 4 mais suenter ina infecziun cun il coronavirus constatada.

Ulteriuras vaccinaziuns cun vaccins inactivads (sco p.ex. la vaccinaziun cunter la grippa) pon vegnir fatgas avant, suenter u a medem temp sco ina vaccinaziun cunter COVID-19.

Tge vaccin vegn recumandà?

Per la vaccinaziun da l'atun 2022 recumandain nus a dunnas en speranza in vaccin mRNA (Pfizer/BioNTech u Moderna), da preferenza in vaccin mRNA adattà ad ina varianta (bivalent), sch'in tal vaccin è disponibel. Quai vala analogamain per dunnas che tezzan. Adattads èn er ils vaccins (monovalents) da fin ussa. Las datas actualas mussan, ch'ils vaccins mRNA utilisads fin ussa protegian er en cas da las novas variantes dad Omicron cunter grevs decurs da la malsogna cun ospitalisaziuns.

Tge vala, sche jau n'era fin ussa betg vaccinada cunter COVID-19?

A tut las dunnas en speranza che n'èn l'atun 2022 anc betg vaccinas, vegni recumandà da sa laschar vaccinar cunter COVID-19 cun duas dosas en in interval da 4 emnas.¹

Co poss jau proteger mamezza supplementarmain?

Er las persunas che vivan cun ina dunna en speranza en la medema chasada, pon sa laschar vaccinar. Persunas saunas, vaccinas sut 65 onns han ina fitg pitschna ristga da survegnir in grev decurs da la malsogna, quai grazia a la protecziun gia existenta. La vaccinaziun las dat ina protecziun minimala e da curta durada cunter ina infecziun cun in decurs miaivel da la malsogna. Tar las variantes actualas dal virus na po ina transmissiun dal virus sin autras persunas strusch vegnir impedita cun la vaccinaziun.

Cun ulteriuras mesiras (p.ex. purtar ina mascrina en locals interns) As pudais Vus proteger supplementarmain cunter ina infecziun cun il coronavirus. As orientai en quest connex a noss principis fundamentals

→ [pagina d'internet «Uschia ans protegjin nus»](#).

¹ A persunas sut 30 onns vegn l'immunisaziun da basa recumandada – en tschertas situaziuns – da preferenza cun il vaccin da Pfizer/BioNTech.

**Tge è uschiglio anc impurtant?**

Sche Vus avais dumondas en connex cun la protecziun da la maternitad, consultai per plaschair las documentaziuns dal SECO. www.seco.admin.ch/mutterschutz

Ulteriuras infurmaziuns

Custs: Ina vaccinaziun cunter COVID-19 recumandada è per Vus gratuita.

Pussaivladads da vaccinar: As infurmai sin la pagina d'internet u tar l'infoline da Voss chantun (www.bag-coronavirus.ch/kantone), nua che Vus pudais As laschar vaccinar.

Ulteriuras infurmaziuns davart la vaccinaziun cunter COVID-19 chattais Vus sin la pagina d'internet da l'Uffizi federal da sanadad publica: www.bag-coronavirus.ch/impfung

Contactai Vossa media u Voss medi en cas da dumondas u As infurmai en Vossa apoteca.

Links:

- [Co funcziuna la vaccinaziun cunter COVID-19? | UFSP \(\[bag-coronavirus.ch\]\(http://bag-coronavirus.ch\)\)](#)
- [Dumondas frequentas \(FAQ\) \(\[admin.ch\]\(http://admin.ch\)\)](#)

